

No laga Dande kaba

Ta un custumber cu despues cu anja a jega na su fin y cu despues cu tiro dal, un ora pa otro por hanja un dande na bo porta. Pero a para bira awor cu dande a bira cos di gana, pasobra bo no ta tende ni mira nan mas y esey ta un sinjal cu nan ta bai cabando poco poco.

Segun comentario di e dandistanan ta, cu ta pa via di e Clubsocialnan y otro medionan cu tin di tene baile, ta responsabel cu e dandenan ta cabando poco poco. Nan kier meen cu tin lugar cu nan ta canta y toca pa mas of menos un cuarto di ora largo y despues nan tin cu stop pasobra no tin hende na cas y resultado ta cu toer ta na un Club of otro lugar di tene baile, y esey ta e causa cu ta kibra nan moral y cu sigoer lo caba cu dande tambe.

Mi ta sugeri pa reserva e habrimiento di anja nobo sin haci baile, y asina

por bolbe rebiba e tradicion di dande atrobe cu tanto nos a celebra toer anja. Ta mashar bunita bailando den club cu habrimiento di anja, pero lo por tabata mas bunita ainda, habriendo anja nobo den bo mes cas hunto cu bo familiasnan y quizas bailando un dande cu a caba di jega na bo porta, y despues bo por bishita bo familiasnan mas sercano den e precioso ora madrugeno ey, cas pa cas y tambe di mas otro amistadesnan.

Loque nos mester pensa ta, cu lo ta hopi tristo pa nos mes caba cu dande, algo unico, algo di nos so y cu ningun otro parti tin algo similar asina, nos mester ta orguyoso di dje, ta un tradicion di toer anja nobo, y invez di nos trata na protehe, nos mes hendenan ta caba cuné. Pero ban trata pa esaki no sosede mas. Laga nos toer coopera y trece e tradicion beck toer anja. Ami, un cliente di musica, abo Director di bo conhunto, abo president di bo Club, laga nos sera cabez hunto y no permiti ningun baile e ora madrugada ey, asina nos por entusiasma e agrupacion di dandistanan pa bolbe rebiba e ambiente dushie y tradicion di toer anja nobo. Mi ta sigur cu kende cu lesa e articulo aki lo bai di acuerdo cu mi, amenos cu nunca e tabata di acuerdo cu e tradicion di tur anja aki. E persona cu por tin algun otro comentario, fabor comenta ariba esaki, pa nos haya un idea cuanto hende a reacciona tocante e sugerencia aki. Pero di antemano mi ta spera cu henter e comunidad lo coopera y apoya e idea aki pa nos por trece beck loque poco poco ta alehando for di nos.

Lo mi desea cu autoridad concerni por colabora cu e comunidad, di prohibi pa Clubnan Social of otro medionan di tene baile. Pero invez duna permit si libremente pa tene baile, pero anja nobo anochie, toch dia 2 di januari toer hende ta liber, asina ta cu ningun hende lo tin cu traha pa su manjan y nan por sosega cuanto cu nan kier.

Y si acaso esey ta imposibel pa autoridad hacie, anto un suplica ta bai directo pa Donjo of presidentenan di Club, tambe na e Directornan di Conhunto etcetera, pa no tene baile of acepta tocá, asina nos mes lo contribui na tene e comunidad na cas pa por rebiba e dande atrobe.

Mi ta comprende cu Clubnan lo perde placa, conhuntonan lo perde placa, pero kiko ta sacrifica quisiera un solo bes den un anja sin hacie baile of acepta pa toca un baile, toch tin henter e anja cu ta bini pa por acepta y toca un baile cuanto bes cu ta necesario.

Sinceramente mi ta pidi sr. redactor di trata pa cada un persona concerni tambe autoridad pa ricibi un copia di e contenido aki. Di antemano danki.

Un admirador di dande,
ISMAEL CROES

NASCHRIFT: Nan tur ta lesa
Amigoe, red.